

Universiti perlu tukar acuan 50-an

B.H 2 SAUG 1993

GOMBAK, Selasa — Datuk Seri Dr Mahathir Mohamad menegaskan universiti dan institusi pendidikan tempatan mesti menukar acuan dan pemikiran tahun lima puluh untuk menangani masalah serta cabaran semasa dan tahun menjelang 2020.

Sehubungan dengan itu, kata Perdana Menteri, pengubahsuaian perlu dilakukan kepada sistem pendidikan dan urusan kemasukan pelajar di institusi pengajian tinggi tempatan untuk menarik lebih banyak pasaran pelajar asing.

Menurutnya, pertumbuhan ekonomi, khususnya di kalangan negara perindustrian baru (NIC) merangsangkan persaingan hebat dan setiap negara menyedari perlunya bersaing bagi meningkatkan pelaburan pema-

ngunaan sumber manusia.

"Beberapa faktor luaran dan dalaman menampikan peluang kepada Malaysia menjadi pusat pendidikan tinggi antara-bangsa yang mampu menarik pelajar dari Asean, Selatan Selatan, anggota Pertubuhan Negara-Negara Islam dan rantau Asia Pasifik.

"Pengubahsuaian perlu dilakukan kepada kandungan program, kaedah pengajaran, sistem pemin-dahan kredit, kaunseling, sokongan sosial dan bahasa pengantaraan di peringkat institusi serta sistem pendidikan tinggi bagi memudahkan penerimaan pelajar asing," katanya.

Dr Mahathir berkata demikian ketika berucap di majlis meletakkan batu asas kampus induk Universiti Islam Antarabangsa (UIA) di Sungai Pusu dekat sini, hari ini.

Turut hadir ialah Menteri Kewangan yang juga Presiden UIA, Datuk Seri Anwar Ibrahim; Menteri Pendidikan, Datuk Amar Dr Sulaiman Daud dan Menteri Besar, Tan Sri Muhammad Muhd Taib; Rektor UIA, Datuk Dr Abdulhamid A Abusulayman, serta perwakilan asing di ibu negara.

Kampus itu dibina melalui dua fasa dan dijadual siap akhir tahun depan. Fasa satu membabitkan kos RM421 juta.

Perdana Menteri berkata, institusi pengajian tinggi tempatan harus berupaya menyesuaikan diri dengan keperluan pasaran dan menyediakan program yang lebih relevan dan berguna kepada masyarakat dari mana penuntut itu datang.

Menurutnya, tindakan itu sejajar dengan konteks persekitaran global yang sentiasa berubah da-

lam pembangunan sains dan teknologi serta kemajuan komunikasi dan teknologi maklumat.

"Adalah dikhawatiri jika universiti tempatan dan institusi pendidikan yang lain masih mengekalkan acuan dan pemikiran tahun 50-an untuk menangani masalah serta cabaran semasa dan tahun menjelang 2020.

"Jika ia sedemikian, maka peluang untuk membangunkan Malaysia sebagai pusat pendidikan tinggi antarabangsa akan terlepas begitu saja. Justeru itu, negara memerlukan model institusi yang lebih dinamik dan responsif," katanya.

Dr Mahathir berkata, ada kira-kira 75,000 pelajar Asean menuntut di luar negara masing-masing pada 1987.

Daripada jumlah itu, 85 peratus tertumpu ke Amerika Syarikat, United

Kingdom, Australia, Jerman, Kanada, Jepun dan Perancis.

Bagaimanapun, katanya, perubahan dasar mengenai yuran dengan memperkenalkan yuran penuh bagi pelajar asing dan faktor kadar pertukaran wang asing memaksa kerajaan serta ibu bapa terbabit memikirkan negara alternatif yang sesuai.

Sehubungan dengan itu, Perdana Menteri meminta semua pihak terbabit mengatur strategi dan tindakan menarik sebahagian daripada pasaran pelajar dan menyumbang *reverse flow* pelajar Asean.

Mengenai UIA, Perdana Menteri berkata, universiti itu harus memperkenalkan konsep Islam dalam menyatukan pendidikan dan menyediakan alternatif kepada pendidikan sekular moden yang memisahkan realiti fizikal

dengan kerohanian.

"Sebagai universiti Islam, UIA wajar memperjuang dan meningkatkan imej Islam yang begitu rendah kedudukannya pada pandangan dunia amnya. UIA juga wajar memperbetulkan andaian dan pengetahuan cetek mengenai agama, masyarakat dan ekonomi Islam," katanya.

Dr Mahathir berkata, potensi UIA tampil sebagai pusat pendidikan tinggi antarabangsa adalah sangat cerah berbanding universiti tempatan lain kerana beberapa ciri keistimewaan dan kekuatan yang ada pada universiti itu.

"UIA harus mengukir kecemerlangan dalam bidang tertentu supaya mendapat pengiktirafan yang lebih luas daripada akademik dan masyarakat antarabangsa," katanya.